

**HUNTO CU HULANDA TA
INICIA FASE 1 DI E AGRI
INNOVATION PARK**



WWW.SOLODIPUEBLO.COM




SOLODIPUEBLO@GMAIL.COM

**REFORMA SALARIAL TA REAL,
SIMAR TA DEN COMICION –
GOBIERNO TIN 500 MIYON; Y
AINDA GERLIEN KIER GAÑA!**



**Parlamentario Endy Croes: Profesionalnan
a contesta!**

**PREGUNTA Y CONTESTA
SECO Y DIRECTO SIN
SAUCE DEN CASO DI
MIKE DE MEZA**



**ATRACO! GERLIEN A CORTA
3 MIYON EXTRA DI SACO DI
MAESTRONAN (LISTA AKI!)**



Awo cu 2 florin mas, bo por gana e MEGA PLUS

*** Afl. 1.000.000,-**

*** Afl. 675.000,- + Afl. 325.000,-
extra**




HUNGA AWO



Benta ta sera 7:30 pm y sorteo ta hunga 7:45 pm

Minister Geoffrey Wever: HUNTO CU HULANDA TA INICIA FASE 1 DI E AGRI INNOVATION PARK



Oranjestad, 26 di juni 2025 – Minister Geoffrey Wever ta anuncia cu Gobierno di Aruba cu sosten di TWO-Nederland a apunta sr. Elwin Groenevelt como projectmanager pa haci e prome “Agri Innovation Park” di Aruba un realidad. Via ampliacion di Landspakket, e desaroyo di e “Agri Innovation Park” ta e di dos proyecto cardinal pa transforma e sector di agricultura den un sector economico innovativo y asina contribui na diversifica Aruba su economia. E prome proyecto tawata ehecucion di e estudio pa Priva/Greengrounds riba e uzo optimal di “greenhouses” den agricultura comercial na Aruba. Resultado di e estudio aki lo wordo uza tambe pa traha prome

“Agri Innovation Park” di Aruba y asina dal pasanan concreto pa e sector di agricultura bira un sector economico importante. Crea sectornan economico nobo ta un di metanan di e maneho economico inclusivo di Gabinete AVP-FUTURO.

Como projectmanager sr. Elwin Groenevelt lo ehecuta fase 1 cu ta bira e base pa construi e “Agri Innovation Park”. Fase 1 ta un plan di preparacion cu lo inclui un estudio di e mercado y viabilidad economico di e “Agri Innovation Park”, un model financiero-operacional-organisatorio cu ta inclui tambe un plan di inversion pa realiza esaki y diseño tecnico y maneho di e facilidadnan



y infraestructura di e parke. Tambelo traha un planning pa fase 2 y 3 cu lo ta encera e construccion y maneho di e “Agri Innovation Park”. E parke lo contribui na aumento di produccion di alimento local, reduccion di dependencia di importacion, y promocion di seguridad alimentario pa medio di tecnologianan moderno y ofreciendo sosten na empresarionan agricola.

Pa financia y ehecuta fase 1 di e “Agri Innovation Park” Hulanda ta pone 75.000 dollar disponibel via Landspakket, y Aruba ta pone 10.000 dollar via begroting di Ministerio di Asunto

Economico. E aplicacion di e ‘Landspakket’ como instrumento ta trece estructura pa e desaroyo di pais Aruba y ta facilita e creacion y ehecucion di varios proyecto concreto na un manera integral. E cooperacion cu Hulanda a resulta di ta uno positivo cu a trece beneficio den forma di experticio, ayudo financiero y asistencia tecnico.

‘Landspakket’ ta un instrumento extra cu Aruba tin na su disposicion por avansa e maneho necesario y realiza e vision economico di Aruba den bienestar di tur ciudadano, y mester percura pa continua haci bon uzo di e

cooperacion aki.

“Experticio, network y experiencia na Hulanda, Europa y e islanan Caribense den Reino Hulandes di sr. Elwin Groenevelt ta trece un balor agrega grandi pa Aruba construi su prome Agri-Innovation Park,” segun Minister Geoffrey Wever. Gabinete AVP- FUTURO tin pleno confiansa cu pronto e parke aki ta bira un realidad unda cu nos localnan den un manera estructura y uzando tecnologia innovativo por cuminsa produci fruta y berdura localmente y contribui na nos economia y seguridad alimenticio.”



Peticion pa aprobacion di un plan di parcelacion na Laga Bena conforme art. 33 di e Ordenanza di desaroyo teritorial (LRO). E concepto di e plan di parcelacion ta poni pa inspeccion publico na **DIP, Sabana Blanco 68**, cu reserva di tur derecho cu cambianan por wordo hasi na e parcelacion, durante un luna desde dia 27 juni 2025 durante oranan di trabao. Tambe e plan por wordo mira riba www.dip.aw.

Interesadonan por entrega te cu un luna despues di e termino aki nan punto di bista por escrito tocante e concepto di e plan di parcelacion serca Ministro di Asuntunan General, Organizacion Gubernamental, Infraestructura i Planificacion Ambiental pa medio di e director di DIP.

ATRACO! GERLIEN A CORTA 3 MIYON EXTRA DI SACO DI MAESTRONAN (LISTA AKI!)

Oranjestad, Aruba – E sector di enseñansa ta enfrenta un situacion preocupante. Solo di Pueblo ta categorise como “codigo cora” cu ta un situacion alarmante. Un documento cu a drenta Parlamento e siman aki ta muestra placa pa diferente scolnan a wordo corta, unda e fondonan ta bini for di un corte grandi den post di Salario di Docenten. Parlamantario Endy Croes a informa di esaki y ta lansa su vos pa cuestiona.

E scolnan menciona den documento cu lo wordo corta ta:
Duna un Man School – Afl. 500.000
Colegio Arubano – Afl. 500.000
Cayenaschool – Afl. 200.000
Maria College – Afl. 200.000
Otro scolnan manera Sint Franciscus College, Fatima College, Mon Plaisir College, entre otro – tur ku Afl. 100.000
No ta prome ves cu Gerlien Croes

como hefe maximo di Enseñansa ta tuma e ruta di austeridad. Riba 28 di maart 2025, e minister ya a implementa un corte di 10% riba e post di Goederen & Diensten, cu a representa un total di Afl. 2.9 miyon. Awor, otro Afl. 3 miyon lo wordo kita, e biaha aki, direktamente for di e salario di e docentenan mes.
E panorama ta alarmante: Kiko ta e rason real pa e cortenan aki? ¿Unda ta e boluntad pa proteha enseñansa a keda?
Minister Gerlien Croes, cu semper a defende enseñansa, debe un splicacion publico na pueblo, na docentnan y na sindicato. Con hende mester wak cu e mes ministerio cu mester inverti den futuro di e pais, ta sigui corta fondonan vital pa nos scolnan?
Yamada na SIMAR: Unda boso vos ta?

E silencio di sindicato SIMAR, cu ta representa e docentnan, ta preocupante. Pueblo ta sperando claridad di e recortenan aki. SIMAR ta consiente di e recortenan aki?
Enseñansa ta e base di nos comunidad. Si nos sigui laga recortenan pasa sin bisa nada, nos ta pone futuro di nos muchanan den peligro.
Aki e lista di scolnan:
Scolnan i e cantidad di placa (For di Salario di Docentnan)
1. Anglo School – Afl 100.000
2. Cayenaschool – Afl. 200.000
3. Mon Plaisir College – Afl. 100.000
4. Sint Franciscus College – Afl. 100.000
5. Maria Goretti Afl 100.000
6. Fatima College – Afl. 100.000
7. HeiligHart Afl 100.000
8. Santa Teresita Afl 100.000
9. Mon Plaisire School Afl 100.000
10. Colegio Laura Wernet Afl 100.000
11. Faith Revival Afl. 100.000
12. Duna un Man School – Afl. 500.000
13. La Salle college – Afl. 100.000
14. Maria College – Afl. 200.000
15. Colegio Arubano – Afl. 500.000
16. EPB Afl 500.000



REFORMA SALARIAL TA REAL, SIMAR TA DEN COMICION – GOBIERNO TIN 500 MIYON; Y AINDA GERLIEN KIER GAÑA!



Minister Gerlien Croes a bisa cu e conseho pa reforma salarial cu ex-minister Endy Croes a laga “no tawata cuadra financieramente” y cu “lo no a beneficia tur docente.”

Esaki ta un falsedad i un desviamento di atencion di e realidad.
E conseho cu a keda atras no ta un idea personal di Endy, sino un trabou serio, presenta pa un comision di profesional di enseñansa, cu tabata inclui:
– Representantenan di Directie Onderwijs,
– Accountant i expertonan financiero, Representantenan di DUOS, Y mas importante: e sindicato SIMAR mes.
Pa minister bin bisa cu e no ta pa tur docente, sin consulta cu SIMAR mes, ta falta di respet na tur esnan cu a inverti tempo y conosemento den e proceso. Si bo tin duda, sinta cu SIMAR, sinta cu e veld. Pero no descuifiqu un trabou colectivo, solamente pa tapa bo falta di tuma accion real.

Y e argumento ku “no tin fondo”?
Esaki ta un otro intento pa crea confusion.
Gobierno anterior a laga mas cu 500 miyon florin den e caha di pais. Geoffrey Wever tin 70 miyon florin cu ta staciona sin plan! Di ki fondo bo ta papia? Bo ta e minister cu ta cortando e salario di nos docentnan, pa despues trata na muestra como si fuera tabo a traha pa e futuro.
E realidad ta:
Gobierno ta kitando 3 miyon florin di salario di docentnan y minister ta sigi baha credibilidad di profesionalnan cu a dedica nan bida na enseñansa.
Ta basta cu e manipulacion.

FILOMENA COLLEGE MAVO SU MUSEUMNACHT TA DIABIERNA 27



Diabierna 27 di juni 2025, Filomena College MAVO ta invita Aruba completo pa su popular evento anual "Museum Nacht cu e aña aki e "Vuelo 2025".

P'e ultimo 4 lunanan tur alumno di Ciclo Basico 1 & 2 y Ciclo Avansa 1, a traha riba e producto cu nan lo presenta e aña aki. Tentnan yena cu cuminda y elementonan tipico di paisnan manera Aruba, Corsou, Venezuela, Canada, Colombia, Mexico, Surnam, Thailandia, Republica Dominicana, Brazil, Haiti y mas, lo ta presenta p'e publico. Exposicionnan lo ta interesante.

E di dos parti dje tereno lo tin show, baile, musica y modeshow crea pa e alumnonan cu a participa na e afterschool program di Baila Bo Historia 2025.

E materianan KGL, Spaans, IK, N&T, CKV, PV, ASW, Papiamento y Nederlands ta esunnan cu ta cargando e evento e aña aki.

Di awo caba coordinador maestra Mariela Carrion,



directorado di Filomena College MAVO y team completo ta gradici Ministerio di Educacion, High Performance, APA NV, Cultuur Fonds Caribisch Gebied, Setar, DOW, Astec, Andina Ice, Casa Haime, Elmar

NV y Albo Aruba pa e cooperacion grandi brinda.

Un y tur ta invita pa ta presente diabierna awo 27 di juni 6:30 pm na nos Museum Nacht – Vuelo 2025.



Clasificados

SOLODIPUEBLO@GMAIL.COM

CEL.585 9500

Parlamentario Endy Croes: Profesionalnan a contesta!

**PREGUNTA Y CONTESTA SECO Y DIRECTO
SIN SAUCE DEN CASO DI MIKE DE MEZA**

Parlamentario Endy Croes a splica cu na yegada na Aruba di Mike de Meza el a papia di entre otro “Persecucion Politico”. Parlamentario Endy Croes ta remarca cu Mike de Meza a lubida cu MEP no ta den gobierno y no ta compronde su ponencia di persecucion. Banda di esaki Mike de Meza a ataca directora di DIMP y awor ta ataca Procureur-General. Pa haya mas claridad nos a logra haci preguntanan na profesionalnan kendenan ta domina e materia y lo pone esaki awe den perspectiva pa asina pueblo mes por saca su conclusion.

Tur e contestanan ta den cuadro di e ley di screening y e BERDAD SECO!

Pregunta na profesionanan y contestacion:

1. Kende na prome lugar ta robes den henter e caso aki?
Contesta: E candidato cu kier bira minister, kende 5 aña prome cu su candidatura NO a cumpli cu su obligacion y debenan fiscal manera tur ciudadano comun y corriente.
2. Kico inspector di belasting mester haci?
Contesta: E mester haci un

investigacion conforme articulo 5 inciso 1 di e ley y pone e formador(nan) na altura di e resultado di e investigacion, esta cu e candidato a cumpli of NO a cumpli e 5 añanan anterior (algemeen oordeel over het fiscale gedrag over de afgelopen 5 jaar).

3. Kico e formador(nan) mester haci cu e conseho (advies) of informacion aki di e inspector?
Contesta: Tuma un desicion conforme articulo 8 di e ley cu SI of NO ta draag e candidato voor na Gobernador pa wordo nombra como minister. Artikel 8 ta stipula : “De FORMATEUR BEVORDERD GEEN VOORDRACHT TOT DE BENOEMING VAN EEN KANDIDAAT INDIEN DE VOORDRACHT ZICH NIET VERDRAAGT MET DE UITKOMST VAN ENIG IN ARTIKEL 2, EESTE LID, BEDOELD ONDERZOEK.” Pues esaki ta e caso den e geval aki.

4. Kende ta fout akinan, e inspector, e formador, e candidato of e Gobernador? Contesta: E candidato kende NO a percura pa su fiscaal gedrag durante e cinco (5) aña anterior di su candidatura tabata corecto of ta den “good standing”. Den e caso actual ta Mike de Meza! Si e candidato



(Mike de Meza) su comportacion fiscal tabata corecto e no lo a hay’e den e situacion aki. Pero apesar cu tin un ley cual a wordo interpreta pa huristanan y tin sentencia di Hues al respecto Mike de Meza ta sigui mira esaki diferente. Segun Mike de Meza e siguiendenan ta robes: 1. Inspector di DIMP, 2. Formador(nan), 3. Procureur-General/, 4. Gobernador, 5. MEP. Pues tur hende y instancia ta robes menos Mike de Meza mes. Un hende asina ta wordo categorisa como un narcista. Na Hulandes tin un dicho: “Je hand in eigen boezem steken”. E ley aki ta pa garantiza INTEGRIDAD di Ministernan. Mike de Meza mes a vota den

Parlamento “VOOR” pa e ley aki wordo aproba y drenta na vigor. Awor cu e ley ta wordo aplica entre otro contra su mesun persona awor diripiente e ley no ta bon. Pa corona e situacion aki Mike De Meza a laga prepara un carta pa su sostenedornan manda pa Rey Willem Alexander riba e topico aki. Pero Rey ta na altura caba di e incumplimento di Mike De Meza pa cu Belasting y no lo duna balor na e ultimo carta aki.

Mike Eman ta aanzet y mester “step up to the Home Plate” pa culmina y Cera e caso aki. Pueblo merece miho!

TRAFICO SIGUR
UZO DI CELULAR DEN TRAFICO,
UN PROBLEMA GRANDI
Nos Celebro no ta diseña pa Multi-task,
bo ta peligra bo bida y di otronan

MINISTER DI DEPORTE GERLIEN CROES TA APOYA Y FELICITA TUR CU A PARTICIPA DEN E IBISA KIDS RUN 2025



Oranjestad, 23 di juni 2025 – Diasabra ultimo, Aruba a vibra cu energia, deporte y alegria durante e celebracion di e IBISA Kids Run 2025, organisa pa IBISA den marco di Olympic Day Celebration. Cu mas di 700 participante for di mas cu 60 scol, muchanan entre 4 y 18 aña a participa den e careda mas grandi di mucha na

Aruba.

E evento, cu ta un colaboracion anual entre IBISA, Comité Olimpico Arubano (COA) y Aruba Bank, ta representa un momento di union y inspiracion pa promove movimiento, salud y spirito deportivo entre e generacion nobo. E demanda pa participa



a keda hopi grandi, demostrando cu e amor pa deporte ta sigui crece den nos comunidad y bou di nos muchanan.

Aunke cu e 'Olympic Day' oficial ta dia 23 di juni, e celebracion a tuma lugar diasabra den combinacion y forma di celebracion cu e IBISA Kids Run. E ambiente tabata festivo y educativo na mes momento: muchanan por a saca potret cu e antorcha olimpico den un photobooth special, a

ricibi nan certificado di participacion na oficina di COA, a participa den un experiencia deportivo, conoce diferente federacionnan di deporte y wak demostracionnan bibo durante e mainta aki.

Minister Gerlien Croes, como Minister di Educacion, Hubentud y Deporte, ta expresa su felicitacion y orguyo na e organisadornan: "Pabien y danki IBISA, Comité Olimpico Arubano y Aruba Bank pa un evento

cu ta mas cu deporte—ta representa union, crecimiento y inspiracion. PABIEN! ta bay na tur mucha cu a participa, y pa cada maestro, mayor y guia cu a duna nan motivacion pa participa y triunfa".

Esaki ta deporte den su forma mas puro: inclusion, diberticion y formacion. Nos ta conta riba nos mucha- y hobennan, y e pasonan cu nan ta tuma awe ta fundeshi pa un Aruba mas saludabel y mas participativo.

Parlamentario Endy Croes:

HEFE DI PRENSA DI GOBIERNO PATA PATA BURACHI Y DETENI!

Mike Eman lo sigui defende su ‘yiu’ di Afl.10.200 florin?

Parlamentario Endy Croes recien a manda algun pregunta por escrito pa Prome Minister di pais Aruba. Algun dia atras polis a gara Marko Espinoza, kende pa hopi aña a traha na 24ora bou di carpatanan di Mike Eman Speed cu Patrick. Marko Espinoza ta esun cu a persigui tur minister di gabinete anterior unda cu nan a bay of ta drumi lanta pafo di bestuurskantoor (Cocolishi) pa asina purba pone presion riba e gobierno anterior cu yen di payasada. Sinembargo Marko Espinoza ta manera un yui di Mike Eman. Mike Eman biologicamente NO tin yui y ta pesey Mike Eman tin un aprecio grandi y amor pa Marko Espinoza, “Amor di Tata.” Pa e rason aki manera Mike Eman a bira Minister Presidente di Pais Aruba el a aloca Marko Espinoza (su yiu) di biaha den su ministerio como Hefe di Prensa di Gobierno di Aruba cu un salario di Afl. 10.200,- pa luna. Esaki a trece cierto disgustonan interno den e fanaticonan di prensa cu ta

AVP. Segun e carpatanan Speed cu Patrick ta con Marko por haya un salario asina halto sin cu e tin scol of preparacion. Anto tur esaki prome cu nan mes. Nos ta laga e pleito interno pa nan cu nan.

Marko Espinoza cu salario di Afl.10.200,- pa luna PATA PATA Burachi: Alun dia atras despues di un evento, Marko Espinoza, e yui di Mike Eman y hefe di prensa di gobierno di Aruba a sigui cu un paranda na “La Oficina” hunto cu su gang. Aki a compronde cu Marko y amigonan hopi cera di Minister Cicilia a bebe te bira burachi y tabata PATA PATA. Algun hende a tuma nota con aparentemente Marko Espinoza a sali di e establecimiento den ora di marduga y segun fuente cu un “swing a la mariposa” a subi tras di stuur di auto.

Otro personanan na sitio a purba di convence Marko pa no core auto burachi paso e ta trece bida di hende den peliger y lo crea mal number pa



su propio gobierno. Segun fuente Marko Espinoza lo a gritanan “Ta nos ta manda” y ni Polis no tin nada di bisami paso eynan tambe nos ta ‘wel connected’. Ni algun minuut despues noticia a drenta cu e mariposa Marko Espinoza kende a sali PATA PATA a accidenta y a cay den un rooi cu su auto.

Patruiyenan cu a yega na sitio a reconoce mesora cu ta e mesun persona cu a wordo geboei den luna di october 2024 cu tabata grita manera alma malo

cu dicon yui di Betico no a wordo geboei. Polisnan a nota cu Marko Espinoza ta bou influencia pisa y a actua corectamente y a bay over na detene Marko Espinoza mesora. Polis a manda pidi transporte special pa hiba Marko Espinoza warda di Polis. Aparentemente Marko Espinoza tabata tin basta dificultad pa subi e auto di transporte. Marko su test a surpasa e limite di tal manera cu Fiscal mester a ordena un cel pa Marko Espinoza pasa e resto di anochi na warda pa su

buracheria pasa y saca su wayaba. Mainta Marko lo a lanta yen di berguensa na warda di polis y a wordo laga den libertad. Mike Eman y 24 ora no a ni papia di e tema aki.

Pregunta publico na Mike Eman: Marko Espinoza ta digno pa keda cu e funcion di Hefe di prensa cobrando Afl.10.200,- pa luna? Ki señal AVP y Futuro ta manda pa comunidad? Nos ta keda en espera di un contesta.

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



OCHO HOBEN DI SVT A COMPLETA E PROME FASE DI FORMACION SOCIAL



Diaranson 25 di juni, Prome Minister mr. Mike Eman, Minister di Relacionnan di Reino mr. Gerlien Croes y Minister di Salubridad Publico drs. Mervin Wyatt-Ras, a asisiti na un ceremonia special na Marinierskazerne Savaneta, na unda cu a haci entrega di certificado na 8 hoben di lichting 19, exitosamente a completa e prome fase di Formacion Social (SVT).

Prome Minister Eman, cu un sentido di orguyo profundo a corda con a

inicia cu e proyecto di gran balor aki pa nos hobennan. Formacion Social ta un proyecto cu a cuminsa na 2011 riba iniciativa di Prome Minister Mike Eman. E obhetivo di Formacion Social ta pa duna nos hobennan un segundo oportunidad y guia nan bek riba e caminda corecto.

Den presencia di Comandante van Wijk, Ministernan, famia y amigonan, a haci entrega di varios certificado cu ta demonstra e

perseverancia y dedicacion di e hobennan aki cu a sa di cumpli exitosamente cu diferente obstaculo cu e pone nan dilanti, den e prome fase. Esaki ta inclui certificado di Karakter Vorming y ART, Les di Etiquette, Zwem Diploma y Certificado di Fase 1 SVT. Ademá Minister Wyatt-Ras, a haci entrega di un medaya special na cada hoben.

Ademá, entre e ekipo di Formacion Social mes, a scohe y duna reconocimiento na algun SVT'er, cu a sobresali pa diferente característica manera:

“Best Man” – SVT'er Perez;
 “Best Buddy” – SVT'er Maduro & Gomez;
 “Best 21C” - SVT'er Kock G.
 “Gouden Laars” – SVT'er Maduro
 “Ambiance Guy” – SVT'er Camargo.

Prome Minister cu hopi orguyo ta wak e fruto di un proyecto asina importante pa e formacion di e hobennan y a gradici e Comandante di Marinierskazerne, e ekipo di Arumil, SVT y e mayornan pa nan compromiso y sosten.

Na final di e ceremonia, Prome Minister Eman hunto cu Comandante van Wijk a firma un convenio pa continuacion di e proyecto di Formacion Social y a desea e SVT'ernan di lichting 19 exito cu e siguiente fase.



MINISTER DI DEPORTE, MR. GERLIEN CROES, A APROBA CONTINUACION DI PROYECTO DI INSTALACION DI LUZ PA VELDAN DEPORTIVO



Oranjestad, 26 di juni 2025 – Minister di Deporte, mr. Gerlien Croes, a confirma aprobacion pa continuacion di e proyecto di instalacion di luz na veldnan deportivo. E ta un proyecto cu Lotto pa Deporte ta cargando financieramente. E iniciativa ta parti di un vision mas amplio pa consolida e infraestructura deportivo y pa crea espacio

sigur, accesibel y cu ta motiva pa organisa mas actividad fisico den tur bario.

Despues di un evaluacion di e prome fase di e proyecto, cu a inclui instalacion exitoso di iluminacion na varios veld, Minister Croes a aproba dia 20 di mei ultimo e siguiente fase cu lo inclui un cantidad adicional di

tres veld cu lo beneficia di miho iluminacion. Esaki lo permiti uso mas prolonga y sigur di e veldnan, tanto pa entrenamiento como pa competencia, den oranan di anochi y ora cu visibilidad naturalmente ta limita.

E siguiente tres veldnan cu lo ta na turno pa haya luznan nobo riba veld lo ta veld di RCA, Riverplate y Nacional, segun e aprobacion cu Minister Gerlien Croes a duna 20 di mei ultimo. E proyecto ta wordo ehecuta den colaboracion cu Lotto pa Deporte y cu apoyo tecnico y logistico di partner strategico.

"Nos ta kere firmemente den e poder di deporte pa



uni comunidad, formacion di nos ciudadanonan, stimula un estilo di bida saludabel y crea oportunidad pa desaroyo personal y colectivo. Iluminacion ta un parti esencial di esaki, y nos ta compromete pa sigui inverti den e infraestructura cu nos deportistanan merece", Minister Croes a subraya.

E continuacion di e proyecto ta anticipa pa cuminsa den e proximo lunanan, cu enfoke riba sostenibilidad, eficiencia energetico y durabilidad di e instalacionnan. Minister Croes a conclui cu un yamada na comunidad pa sigui cuida y haci uzo di e espacionan deportivo sanamente.

MINISTER GERLIEN CROES A ATENDE DIALOGO CU NEDERLANDS JEUGDINSTITUUT (NJI) ENCUANTO MANEHO DI HUBENTUD

Oranjestad, 24 di juni 2025 – Finalizando su bishita oficial na Hulanda, Minister di Hubentud, Gerlien Croes, a realisa un encuentro constructivo cu e instituto reconoci; Nederlands Jeugdinstituut (NJI). Un instituto di conocimiento cu ta maneha integralmente temanan relaciona cu hoben y nan bienestar.

E reunion a enfoca riba e rol primordial cu Nederlands Jeugdinstituut ta hunga na Hulanda den formulacion di strategia y guia pa e desaroyo di hubentud riba tur nivel. Minister Croes, a tuma e oportunidad

pa dialoga abiertamente riba experiencia, metodonan, y structura cu Nederlands Jeugdinstituut ta aplica pa duna apoyo efectivo na e manejo di mucha y hoben na Hulanda.

E intercambio a sirbi pa explora posibilidad concreto di colaboracion entre Aruba y Nederlands Jeugdinstituut.

"Nos mester traha riba un enfoke integral pa nos hubentud, unda e bienestar educativo, social y mental ta ser cuida di manera conecta y sostenibel", Minister Croes a enfatisa.

E meta ta pa yega na solucionnan



duradero y adapta na contexto Arubano, cu por fortalece e red di sosten pa nos hubentud. E reunion ta representa un paso importante den esfuersonan pa amplia e capacidad local, stimula

innovacion, y crea base pa un colaboracion amplio entre otre den Reino pa un Aruba cu mas comprension, direccion y manejo debido integral pa nos generacion nobo.

Op=Op a trece tremendo seleccion di productonan pa su folder di zomervakantie!

HOT SUMMER VIBES

- Ice Cream Dish Set 9pcs: 12.⁹⁹ 3x=32
- Drinking Cup with Straw 500ml: 4.⁹⁹ 3x=12
- Tumbler 1200ml | 40.58oz: 25.⁹⁹ 3x=65
- Melamine Cup: 3.⁹⁹ 3x=11
- Cooling Bag 3 Variants | 35L: 27.⁹⁹ 3x=25
- Melamine Bowl 18.2cmx5.6cm: 4.⁵⁹ 3x=12
- Cooling Bag with Ice Pack 4 Variants | 7L: 9.⁹⁹ 3x=70

OP=OP voordeelshop

SUMMER FUN IN THE SUN!

- Hanging Chair Dia 80cm: 86.⁹⁸
- Hammock 3 Variants | 200x100cm: 32.⁹⁸
- Inflatable Pouf 4 Variants: 27.⁹⁹ 3x=70
- Adjustable Folding Chair: 124.⁹⁸
- Folding Beach Chair 3 Variants: 43.⁹⁸
- Metal Folding Chair 3 Variants: 27.⁹⁹ 3x=70

OP=OP voordeelshop

MONDAY - SATURDAY 9 AM - 6 PM • XXL STORE & SAN NICOLAS SUNDAY 9 AM - 1 PM • VALID: 26 JUNE - 13 JULY 2025

Op=Op Voordeelshop ta cla pa zomervakantie—y bo por disfruta cu un staycation E folder nobo aki tin tur cos cu mester pa pasa un dushi zomer! No lubida nan tremendo seleccion di productonan pa cas y uzo personal! Pasa cualkier di e 3 localidadnan: XXL Sasaki, Paradera of San Nicolas y busca tur cos cu bo mester y mas. Valido te cu dia 13 di juli.

Clasificados

CLASSIFIEDS

SOLODIPUEBLO@GMAIL.COM
CEL. 585 9500

SOLO Di Pueblo

5 TIPS PA DOÑONAN DI MASCOTA DURANTE MAL TEMPO

1. Tira un "auricular" pa bo mascota pa prepara y inclui bo mascota den dje. Kòsa nan ta bo ta haci uzo di dje pero "better be safe than sorry". Diferente accesorio di aseasonnan pa un "uoriel" case accesorio y percura pa por aseasona e plan ald na cualquier momento teniendo cuenta cu tur cos cu bo ta haci lo mester ta facil y accesible pa por uoriel pa 24 horas, por:
2. Percura pa bo mascota tin un caminda pa aseasona pa aseasona.
3. Percura pa bo mascota tin un caminda cu e por aseasona algun di e lugar aseasona di tempo cu aseasona.
4. Percura pa bo mascota cu vacunanan ta up to date pa nan ta bon prototela contra malestanan infelices cu por sangi especialmente ora aseasona hopi.
5. Percura pa bo mascota tin un microchip. Elorcu un banchi cu aseasona por yuda pero un caso aseasona perde a banchi aki por trata e info bek via e microchip, contata cu bo info ta up to date.

Un pet carrier
Un kartsbak cu su valling
Saco di plastic pa pone nan coshi aden
Extra lechi
Un coy lunga
Buki di vacuna
Sikiera un petnet di bo mascota

I ♥ PET
Stima Mi Mascota

ARUBA TOURISM AUTHORITY (A.T.A.) TA REFORSA STRATEGIA DI COMUNICACION PA 2026 PA E REGION DI NORTE AMERICA



E ekipo di Aruba Tourism Authority (A.T.A.) tawata tin nan reunionnan strategico na New York hunto cu e agencianan di mercadeo cu ta apoya A.T.A. pa delinea y ehecuta strategia pa promove Aruba den e region di Norte America. A repasa diferente estudio pa duna contenido pa plannan pa 2026. A elabora riba diferente tema incluyendo rendimiento di turismo y desaroyonan actual di e mercadonan. A comparti estudio di posicionamento pa Aruba como marca den e mercado di Merca y e aspectonan geopolitico y economico di e region a

wordo analisa y discuti.

Agencianan a comparti un analisis di competencia riba diferente disciplina di mercadeo, y a duna mas informacion riba tendencianan global di turismo. E data aki ta importante na momento di tuma decisionnan pa 2026. Hunto, a evalua e esfuersonan actual y a identifica oportunidadnan pa innova y mehora e strategia di mercadeo y comunicacion. E topico di turismo responsabel a bin dilanti como parti integral di e diferente combersacionnan como un tema primordial pa e

strategia di comunicacion pa Aruba.

Den pasado e enfoke tawata riba con nos ta promove Aruba den exterior solamente y e diferencia ta cu awor nos a agrega e comunicacion cu e huesped asina cu e yega nos isla. E cambio aki ta duna nos e oportunidad pa educa y conscientisa nan riba e aspecto di proteccion y preservacion. Diferente charla duna door di e ekipo di A.T.A. a wordo comparti pa asina tin alineacion entre agencianan riba esfuersonan. Ta importante pa crea sinergianan conectando e comunidad local cue huespednan ariba varios iniciativanan local.

Un di e presentacionnan importante cu a tuma lugar a enfoca riba e aspecto



“niche” cu ta wordo considera un motibo specifico cu un persona ta scoge un destinacion. E “niche” culinario y di bienestar a resalta den dialogo y tambe ta importante pa menciona e aspecto di cultura cu sigur ta un motibo importante cu huespednan di awendia ta considera ora di scoge un destinacion.

E sesion final a enfoca riba futuro di tecnologia,

particularmente Inteligencia Artificial (AI), y su rol importante den mercadeo y e “customer journey”. Ta esencial pa monitor tendencianan mundial pa asina Aruba por keda competitivo.

E tipo di reunionan aki ta clave pa formula e plan di mercadeo pa e aña venidero y asina establece strategianan y tacticanan cu ta alinea cu metanan pa Aruba su turismo.

FORTALEZA PA FAMIA

Scirbi pa Pastor Marcel Balootje

TE KI DIA ABO LO SIGI BEBE?



Alcohol y Droga cu ta dos criminal den Famia cu tur dia ta wordo halsa, y promovi manera cuminda, ta un causante primordial di nos crisis social. Hende keto bay ta kere cu ta solamente Covid y falta di trabao ta hinca nos den crisis social. Nos ta duna Gloria na Dios na e momento cu nos por bin bek riba pia, y cu porta di trabao por habri bek riba nos isla, y cu negoshinan berdadero y limpi, integro lo wordo estableci, caminda

hende por sinti nan mes bon manera semper ora nan por menciona e compania, of negoshi cu nan ta traha pe.

Bebemento, no ta cos di awe, pero ora e sali for di man, e ta bira buracheria, y despues bo ta cay den alcoholismo, asina bira un persona cu no por sin alcohol, y cu ta bebe hasta na momento cu bo ta riba trabao.

Tin hende ta defende nan mes bisando cu ningun caminda den beibel, no ta

bisa pa no bebe, pero nos kier recorda tur hende, cu tur tipo di goloseria ta pica, pasobra si bo come hopi, sin control bo ta bira obeso, y obesidad ta trece malesa, y mesun cos si bo ta Bebe hopi, bo ta falta respet pa hende y hende lo falta respet pa bo, bo ta bira alcoholico, y alcoholismo ta produci hopi enfermedad.

Palabra di Dios no ta defende maldad y ta splica hopi cla cu buracheria no ta aceptabel, den bista di Dios, y tambe no bini cu e chiste acostumbra di e historia cu Hesus mesa parti biña na e casamento di Canaan, pasobra esey tabata biña no fermenta, pasobra ora bo primi druif pa traha biña mas tanto e para mas sterki e bira y bo no tin mester di pone ningun quimico den dje.

Mayoria bebida sterki awendia ta contene quimico, y ningun hende no por determina, cuanto

nan ta bebe prome cu nan bira burachi, tur cos ta depende di bo presion di sanger, di bo comemento, y tambe di bo Descanso, pero pa un hende cu ta stima su Famia nos ta desconsheha bebemento totalmente, pasobra Alcohol ta caba cu Famia, y te awe tur hende cu a purba caba cu Alcohol, ta bao di tera.

Pa refresca memoria di esnan cu ta pretende cu e bandera di Alcohol, mester wordo hisa tur dia den nan bida, no ta importa na unda nan ta, sea nan ta riba trabao, y trabao di responsabilidad grandi, hefe di departamento, hende den funcion publico, hende cu merdia den nan break ta bay den nan auto bay dal dos bitter di whisky pa nan por sigi traha. Ata locual Beibel ta bisa lesa esaki pa bo mes :

Pa e hoben mucha homber/muher. Deuteronomio Capitulo 21; 20-21.

Pa tur hende grandi homber /muher cu ta pretende cu mester bebe, y cu ta destrui nan cas y nan famia, y caba cu nan propio integridad y pone nan salud na peligro.

Proverbio 20 ver 1. Proverbio 21:17. Proverbio 23:30-31 t/m 35.

Isaias Capitulo 5 vers 11-12.

Tito 1 vers 7. Tito 2 vers 3. Romanos 13 vers 13.

Y si te ainda bo tin defensa pa sigi bebe y sconde tras di cualquier fabula, of bisa cu orguyo ta mi placa, mi ta bebe cuanto cu mi kier, nos kier bisabo cu un hende cu ta bebe tur dia. ta den rebeldia contra Dios. Ta berdad cu Apostel Pablo a yega di bisa pa bebe un tiki biña pa bo stoma ora bo tin e problema ey, pero ningun caminda no ta para scirbi pa hala alcohol manera un tanker, manera alcohol ta bida, y asina perde control di bo actitud, y pone bo hogar y comunidad na peligro. Un persona cu di curazon kier sirbi Dios no ta bebe.

Alcohol ta pone cu bo no por rasona, ni serca hende ni tampoco serca Dios, Spirito Santo no ta presente caminda alcohol ta domina, no laga diabel gañabo, pidi Dios yuda bo pa asina kibra e vicio di alcohol for di riba bo bida, y no discuti, pero obedece e Palabra di Dios. Obedencia ta mihor cu sacrificio.

Consecuencianan di drumi cu lens den wowo

Yega cansa despues di tabata henter dia ariba abao y unico cos cu bo kier ta descancer. Pero bo ta lubida di kita bo lensnan. Kico ta pasa ora cu nos lubida di kita nos lensnan?

Según un estudio publica pa FDA, ora cu nos uza contact lens, ta necesario pa sigui, 'al pie de la letra' e cuida cu e specialistanan

ta indica pa evita complicacionnan di salud.

Cuido di contact lens:

- Aplica cu mannan limpi: ta hopi importante cu ora cu bo ta uza lens bo haci esaki cu bo mannan limpi. De lo contrario bo lo por contamina e lens.
- Preferiblemente uza e ringvinger ya cu esaki tin menos forsa

- Haci e lensnan limpi cu'n likido special, dependiendo si nan ta hard of soft-lens: Si nan no wordo haci limpi cu'n likido special, bo por dañe e lensnan.

Kico ta pasa si mi drumi cu mi contactlens?

En realidad ta depende di e oxigeno cu bo lensnan tin, entre mas oxigeno nan tin, miho. Si bo drumi cu contactlensnan, pa un lapso cortico di tempo, of pa un solo anochi eigenlijk e no lo mester trece mucho complicacion mas cu iritacion den wowo.

Pero si bo pasa e tempo, es decir, mas di un dia, e lo



por provoca un infeccion ocular, por ehempel: conjuntivitis.

Sintomanan:

- wowo ta core awa
- wowonan ta bira cora
- kimamento di wowo
- stof den wowo
- vision wazig (den algun caso)

E uzo di contact lens ta cada biah mas comun, ya cu e ta un alternativa poco invasivo pa mehora e vision. Pero si nos no ta cuida e lens, esaki por ta contraproducente.

Expertonan ta recomenda pa semper saca e lens prome cu drumi. Miho preveni, cu lamenta.

MINISTER DI EDUCACION, MR. GERLIEN CROES A CELEBRA 80 AÑA DI ATIA Y REAFIRMA CU EDUCACION TA E BASE PA FUTURO ECONOMICO DI ARUBA



Oranjestad, 26 di juni 2025 –Minister di Educacion, mr. Gerlien Croes, tabata presente den e celebracion di 80 aña di Aruba Trade and Industry Association (ATIA), compartiendo su felicidad y aprecio

na e organisacion cu a yuda forma panorama economico di Aruba pa ocho decada. Minister Croes kier enfatisa e conexion importante entre educacion y desaroyo

economico, estimulando un cooperacion mas fuerte entre educacion y comercio na Aruba. Prosperidad di nos isla no ta depende solamente riba turismo, economia di conocimiento y innovacion sostenibel, pero ta depende tambe riba e hende cu ta drenta den e motor economico.

Esaki ta cuminsa cu un sistema di educacion structura, relevante y fuerte. Nos mester prepara hobennan pa no solamente tin e conocimiento academico, pero tambe pa tin e habilidad pa pensa critico, colabora den diversidad di areanan profesional y innova cu proposito. Nos scolnan, institucionnan tecnico y

universidadnan mester bira centronan di oportunidad y innovacion, alimentando directamente e crecimiento di nos economia. Un danki na e invitadonan special, tanto local y internacional, cu a comparti nan experiencia, conocimiento y perspectiva como orador y den e grupo di discusion forma pa profesionalnan di diferente sector.

Nan aportacion a eleva e nivel di e celebracion y a inspira un dialogo constructivo riba futuro economico di Aruba. E evento di aniversario a trece lidernan di organisacionnan, lidernan politico, y empresarionan hunto pa aprecia e trabou grandi cu ATIA a logra eherce pa 80 aña caba — tur cu un vision comun pa un Aruba sostenibel y prospero.

Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - June 26, 2025

CATOCCHI Sorteo # 4662 1527 1366 4115 MULTI X X3 BIG 4 Sorteo # 4662 4879 MULTI X X2 10FF Sorteo # 2718 6131 ZODIAC Sorteo # 4662 5389 Capricornio LUCKY 3 Sorteo # 1536 701 MULTI X X2	LOTTO 5 Sorteo # 0 x Jackpot 0 x Match 4+ 0 x Match 4 0 x Afl. 12,00 Joker Letter Proximo Jackpot 180.000,-	LOTTO DIA Sorteo # 0 x Jackpot 0 x Match 4 0 x Afl. 8,00 Proximo Jackpot 52.000,-	MEGA Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot 675.000,-	MEGA PLUS Afl. 1.000.000,-	KORSOU Sorteo #
---	---	--	--	---	-------------------------------



TIENDA DI EDUCACION: AMOR INCONDICIONAL



Tin amor propio, tin amor pa bo prohimo pero tambe tin amor pa bo yiu(nan) cu ta un amor incondicional. Luna di februari ta conoci pa ta e luna di amor y amistad. Como mayor tur dia ta un dia di duna amor pa sea e baby e mucha of e adoles-

cente. No solamente cu palabra, pero tambe cu hecho nos por demostra cu di berdad nos ta stima nan. Ta importante pa ora di muestra nan e amor cu nos tin pa nan pa busca e contacto visual pa asina confirma y fortifica e palabranan di

stimacion.

Amor incondicional
Kico nicifa amor incondicional realmente? Amor incondicional significa un amor caminda no ta conoce limite of no tin condicion mara na esaki. E por wordo yama tambe amor cu compassion of wordo asocia cu amor completo. Pensa ariba e amor cu bo mayor(nan) kisas tabata of tin pa bo y naturalmente e amor cu abo mes como mayor tin pa e yiu(nan). Como mayor ta importante pa duna amor na e yiunan pero esaki no significa cu lo laga e yiu(nan) haci locual cu nan kier. Pues mester pone regla y limitacion cerca e yiu(nan) pa nan mesun proteccion. Esaki tambe ta parti di amor y lo mester wordo practica di un edad jong of for di baby caba.

Kisas ta dificil pa bisa e mucha un no of cu no por. Pero nan tin cu siña deal cu esaki. Ta importante pa duna e yiu(nan) na un momento asina un splicacion pakico. Tambe si tin posibilidad pa duna un of mas alternativa of opcion ariba locual no ta posibel. Papia tocante amor y intimidad

Ta importante cu mayor comunica y papia tocante di amor for un edad hoben cu e yiu(nan). Pregunta(nan) lo surgi for di e mucha(nan)

tocante e topico y lo yega un dia cu e mucha of hoben lo tin tambe sentimento di amor y intimidad. Esaki pa hopi mayor kisas ta un topico dificil pa papia cu e yiu(nan). Si mayor tin dificultad pa papia tocante intimidad y sexualidad semper por acudi of comunica cu Tienda di Educacion.

Nos ta bibando den un era caminda cu informacion ta tur caminda, e cuestion ta si acaso e informacion ta esun corecto. Vooral ora ta trata mucha of hoben ta importante pa nan sa cu no tur informacion ariba internet ta cuadra cu e realidad. Ta bon pa busca e fuente di unda e informacion ta bin. Tin organizacion grandi internacional cu por ehempel tin otro metanan di existencia y no tur ora ta cuadra cu e meta di duna of informa e comunidad, kisas pa por bende

un servicio of producto.

Tienda di Educacion
Mayor bo no ta para pa e retonan aki boso. Ta tar eanan cu por muestra dificil pero Tienda di Educacion t'ey na disponibilidad di comunidad di Aruba pa duna abo e sosten y guia gratis. Por contact Tienda di Educacion na 161 cu ta disponible di dialuna pa diabierna di 8 am pa 6 pm non-stop.

Tambe por like nan Facebook page keda informa y tambe comunica di nan serviccionan.

Tienda di Educacion ta situa den edificio di Centro pa Hoben y Famia na Sabana Blanco 68-C y ta na servicio di henter comunidad. Nos muchanan ta nos futuro. Ban crea un futuro caminda cuida propio ta wordo practica constantemente.

"Maestro, mi kier sigui Bo." (Mateo 8,19)

E ta enfoca riba e yamada radical di Hesus pa sigui'E.
Un yamada cu ta encera laga comodidad y seguridad atras pa brasa un bida di fe y servicio.
Hesus ta adverti cu sigui'E lo no ta facil, lo no tin un luga fisico pa pone cabes, pero e recompensa ta sigui'E y su caminda.
Sigui Hesus no ta djis un opcion entre otro, pero un cambio completo di bida. Seguimento ta rekeri destacamento, entrega e buskeda di seguridad y consuelo pa enfoca riba e mision di Hesus.
E bida di un cristian no ta facil, pero e recompensa ta sigui Hesus y haya nificacion y proposito den su caminda.
Fe den Hesus ta encera laga bay loke ta mara nos na e mundo aki y enfoca riba e eterno, riba e reino di Dios. Hesus ta yama bon bini na interaccion habri y personal cu nE;
E kier extende na nos un parti den su misericordia. Pero nos tin fe pa depende riba su misericordia?
E ta un invitacion pa hinca nos mes radicalmente den un intimidad mas profundo cu nE. Pa nenga e invitacion ta perde henter e punto di nos encuentro cu nE.
"Si awe bo tende su bos, no haci bo curason duro."
Oracion: Maria, yuda mi mira e cara di bo Yiu, e cara di misericordia.
Amen.

ALBO ARUBA
general contractor



AWM
infrastructure



Cu profundo tristeza Staf y Personeel di Algemeen Bouwbedrijf Albo Aruba N.V. y N.V. Arubaanse Wegenbouw Maatschappij ta anuncia e fayecimento di

Señora Anna Werleman-Geerman

na bida mama di nos colega nan Marcelino y Casimiro (Milo) Werleman y ruman di nos colega Alejandro (Mando) Geerman

Algemeen Bouwbedrijf Albo Aruba N.V. y N.V. Arubaanse Wegenbouw Maatschappij ta desea Marcelino, Milo y Mando y demas famia hopi forza den e dlanan dificil aki.

Nos ta spera cu e bunita recuerdonan cu nan serkeri a laga atras lo sirbi di consuelo.

Staf y Personeel di Algemeen Bouwbedrijf Albo Aruba N.V. y N.V. Arubaanse Wegenbouw Maatschappij ta manda palabranan di profundo condolencia na famia di Señora Werleman-Geerman.

**Cu Señora Werleman-Geerman
por sosega na paz.**

TEAM SNOR A ACEPTA CHALLENGE DI BOU PALO BOYS DI ALTO VISTA!



Calabas/Kudawecha - Diasabra awo, 28 di juni, e centro di pega piedra, e mundialmente famoso Domino Square Garden, un biaha mas lo ta e epicentro di otro temblor den mundo di domino! E ekipo di Alto Vista, esta Bou Palo Boys di ‘High View’, a challenge Nelson “Snor” Perez su ekipo pa midi forza e fin di siman aki. Mas cu claro, Team Snor no ta riña pa niun team y a acepta e reto di biaha!

Papiando di reto, na mesa di redaccion a yega un vroem-vroem di un caso straño di “schoenmaker blijf bij je leest” cu a pasa n’un conocido restaurant crioyo den curason di Tanki Leendert.

E hungadonan cu ta frecuente e restaurant cu ta carga e mesun number cu su doño, a dicidi di challenge Team Snor p’un wega di domino, cual wega a tuma lugar diasabra ultimo n’e restaurant aki, cual su number ta caba cu “Place”. Wel, manera nan ta bisa na Ingles: “Guys, don’t quit you dayjob”! E ekipo di Snor den un frega di wowo a pone su contrincante “in their

place”! Vap vap Team Snor a pone tur na nan luga cu score aplastante di 21 - 10! Un “slam dunk” cu lo keda resona pa basta tempo tras dje bar dje establecimiento! Mientras tanto shonnan, Team Snor ta rumbo pa enfrenta otro desafio, e biaha aki dje trabuconan cu ta train bou dje palonan ay na Alto Vista! Diasabra proximo, 28 di juni, cuminsando pa 8’or

en punto, e trabuconan lo baha foi patras di tanki di Alto Vista pa bin muestra Team Snor es un ke otro den domino! Manera ta custumber, entrada ta completamente gratis pa pueblo en general, y durante halftime e pasapalonan lo lora totalmente por nada. Bini un bini tur pa presencia e estreno dje ekipo di Alto Vista! Yega!

Paga bo cuenta online ta facil



Sea Abonnement of Aviso

Pago online, facil y lihe

Pa hasi pago online pone number y adres na cuenta di banco RBC Sunmax Printing
account # 7700000100152447

SUDOKU

8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		5	3					
8							2	
	7			1		5		
4					5	3		
	1			7				6
		3	2				8	
	6		5					9
		4					3	
					9	7		

FORTALEZA PA FAMILIA

Scirbi pa Pastor Marcel Balootje.

AROGANCIA Y ORGUYO POR STROBA SANACION FISICO MENTAL Y SPIRITUAL

Tin algo cu nos mester tene bon na cuenta, cu e mal spirito di arogancia y orguyo por ataca tur hende pasobra e ta disfrasa di hopi manera, hasta den orguyo spiritual.

Esey no ta nifica cu ta cierto hende so ta orguyoso y arogante, pero tur hende ta vulnerabel pa arogancia y orguyo.

Pasobra e mal influencia ta drenta den tur caminda cu e hanja un curason habri cu no tin temor di Dios.

Den bijbel tin dos homber cu tabata yena cu orguyo, arogancia y soberbia, nan number tabata cuminsa mesun cos, un tabata yama Namaan (2 Reynan 5:1-17), y otro yama Nabal (1 Samuel 25:1-39). Tur dos tabata orguyoso, Namaan a acepta e condicion di Dios pone pa su sanacion, y a wordo sana, pero Nabal a keda para den su maldad, arogancia, orguyo y

soberbia y no a pidi despena, y esey a causa su bida.

Arogancia ta pone hende perde bon amistad, pasobra arogancia ta pone bo trata hende malo, falta respet, y mas cu tur cos rechasa esnan cu realmente ta di bo.

Orguyo ta enemigo di Dios, Dios ta odia orguyo, pasobra ta pa motibo di orguyo cu angel a bira diabel y rebeldia contra Dios. Esey ta nifica cu ora un e hende ta orguyoso e ta biba den enemistad cu Dios.

Ora nos ta papia di sanacion, nos tin cu tene cuenta cu lo siguiente: Awendia nos tur ta na altura di e situacion di salud mental, cuanto depresion, stress y hende traumatiza tin ta biba hunto cu nos.

Pero locual ta sosode ta cu hopi no ta kere, cu nan salud mental ta depende di nan relacion cu Dios y nan

prohimo, den cual nan tin cu sinja pordona, pa nan tambe wordo pordona.

Un cos ta masha importante pa hende pordona di curason (Mateo 18:35), pasobra Dios no ta haci wega cu e asunto di pordon, y hopi biaha pa falta di pordon y no kier laga los di pasado, hende ta keda malo mental y fisico. Dios ta prohibi pa nos recorda cosnan di pasado. (Isaias 43:18-19).

E terapia di pordon ta Dios

so por ofrece, pasobra e ta contene confesion na Dios, y pordona di curason esun cu a herida bo of cu abo a herida, pasobra ta solamente asina e lus di Dios, lo bolbe riba bo bida.

Pasobra mientras cu bo ta cana cu falta di pordon riba bo curason, bo ta cana den scuridad, y nos tur sa cu ora un hende ta cana den scuridad tur sorto di cos malo por sosode den su bida.

Esun cu ta calumnia su prohimo den secreto, esey lo mi destrui, lo mi no soporta ningun hende cu tin mirada altanero (orguyoso) y un curason arogante. (Salmo 101:5).

E temor di Senjor, ta pa odia maldad, orguyo, arogancia, y mal caminda y un boca perverso mi ta odia. (Proverbionan 8:13).

E malbado cu su cara yen di orguyo, no ta busca Dios, Tur su pensamiento ta, no tin Dios. (Salmo 10:4).

No laga ningun hende ganja su mes. Si un hende entre boso ta kere cu e ta sabi, den e siglo aki, lage bira bobo, pa e por bira sabi. Pasobra sabiduria di e mundo aki ta bobedad dilanti di Dios. (1 Corintionan 3:18-19).

Pasobra tur loke cu tin den mundo, e deseo di carni, y e deseo di wowo, y e orguyo di bida, no ta bin di e Tata sino di e mundo. (1 Juan 2:16).

Den arogancia y orguyo no tin nungun clase di ganashi tampoco crecimiento.

Humildad semper lo hala nos mas serca Dios.

Sinceramente, Pastor Marcel Balootje.

Clasificados

Icons: Car, House, Shopping Cart, Briefcase, Wrench, Couple.

CLASSIFIEDS

SOLODIPUEBLO@GMAIL.COM
CEL. 585 9500

SOLO Di Pueblo

Oracion di dia

Un feliz comienso di weekend colma cu hopi amor y bendicion di Dios.

Stima Señor, bo Dios, di henter bo curason, cu henter bo alma, cu henter bo mente, y cu tur bo forsa. E di dos mandamento mes importante: "Stima bo prohimo manera cu bo ta stima bo mes. No tin ningun otro mandamento cu ta mas importante cu esakinan." (Marco 12, 30-31)

Dios a crea bo segun su imagen, a duna bo e mesun capacidad pa stima, a supla den bo e mesun rosea di amor. Si bo ta cristian, bo tin cu tuma e antorcha di amor for di Cristo, charge cendi durante henter bo bida, y pase despues na bo yiunan, na bo amigonan y coleganan. E antorcha di amor aki tin cu pasa di man pa man, tin cu cende cas pa cas, ilumina curason pa curason y mente pa mente. Scuridad tin miedo di e antorcha di amor aki. Unda e antorcha aki ta cendi scuridad ta dirti bira nada, manera pida ijs. T'esaki ta amor: no ta nos a stima Dios prome, sino t'E a stima nos y a manda su Yiu pa E bira sacrificio pa pordon di nos picanan. (1 Juan 4,10) Solamente ora bo ta descubri e tesoro cu ta den bo paden cu yama amor y solamente ora bo ta entregue na otro, lo bo ta feliz.

Oracion: Señor guia mi y proteha mi den Bo cosnan di haci di tur dia. Pa bo Amor ta semper hunto cu mi. Bo promesa ta real! No obstante ki tribulacion mi haya mi aden, mi sa cu Dios no ta laga mi bandona, den number di Hesus di Nazaret. Amen.